



*Kamis, 23 Pebruari 2023*

**Ogen: Ketangkasan 4:11**



**IJADIKEN GUNA DIBATA**



Ise kin si patut ngaloken pujin ras kemulian? Tentuna kalak si mbisa, si erkuasa seh maka mehamat, mehangke kerina kalak man bana. Arah renungenta enda ituriken maka la saja manusia si ersurak, nembah muji Dibata. Tapi mahluk-mahluk surgawi pe rende muji Dibata, rikut pe kerina pertua-pertua e menterken mahkotana ilebe-lebe kursi kinirajan e janahna ngerana. Kai siilakoken pertua-pertua e ertina maka mahkota siipakena e labo kai pe ertina. Sabab labo ia pantas ngaloken kemulian ras kehamaten e. Emaka kerina ia ngataken maka Dibata ngenca si metunggung ngaloken kemulian, kehamaten ras kuasa. Sabab Dibata jine me sinjadiken kerina sinasa lit. Emaka kerina sinasa lit e arus muji ras mpermuliaken Dibata. Bageme arusna kerina ersembah man Dibata. Erkiteken peratenNa nge maka kerina si lit nggeluh.

Rikutken sienda nuriken maka kerina si itepa, ijadiken Dibata e guna IA, guna muji ras mpermuliakenca. Sabab IA nge ngenca pantas ngaloken kehagan e. Emaka bagi kerina mahluk si rende ras nembah Dibata alu luar biasa, bagi pertua-pertua si menterken mahkotana bageme kita iajuk nandai dirita iadepen Dibata. La mpertahanken posisi, pangkat ras kerina si lit ibas dirinta seh maka lanai kita ngasup erjimpuh man Dibata ntah pe lupa diri maka kita enda terjeng tinepa siitepa guna mpermuliaken Dibata.

Gambaren cara ersembah si isurga enda mpersingeti kita maka la saja idoni enda kita ersembah ku Dibata. Arah kai siituriken kitab Ketangkasen enda, isurga pe pepagi kepeken ersembah ngenca dahinta, muji-muji IA. Adi bage, sibiasakenlah kecibal, situasi surga e ibas kegeluhenta siteptep wari. Mari ersembah man Dibata alu ngumban cara ersembah isurga. Sabab guna sie me kita itepa Dibata, guna mpermuliaken ras muji Dibata segedang geluhta.